



**Tužilaštvo - Tužiteljstvo Bosne i Hercegovine
Тужилаштво Босне и Херцеговине**

Broj: T20 0 KTOV 0022973 25

Sarajevo, 3.9.2025. godine

SUD BOSNE I HERCEGOVINE

SARAJEVO

- Sudiji za prethodno saslušanje -

Na osnovu odredbi člana 35. stav 2. tačka i) i odredbi člana 226. stav 1. u vezi sa odredbama člana 227. Zakona o krivičnom postupku Bosne i Hercegovine (u daljem tekstu: ZKP BiH) p o d i ž e m:

OPTUŽNICU

Protiv:

- 1. ZLATKO IBRIŠIMOVIĆ**, zvani „Zlaja“, rođen 1985. godine u Sarajevu, državljanin Bosne i Hercegovine,
- 2. ALEM HODOVIĆ**, rođen 1983. godine u Priboju, državljanin Bosne i Hercegovine i Republike Srbije,
- 3. MAJA PAPIĆ**, rođena 1966. godine u Sarajevu, državljanka Bosne i Hercegovine i Kraljevine Nizozemske,
- 4. FIKRET MEMIĆ**, zvani „Fiko“, rođen 1954. godine u Sarajevu, državljanin Bosne i Hercegovine,
- 5. PRAVNO LICE „E.S. TECH“ d.o.o. SARAJEVO**, sa sjedištem u Sarajevu.

Što su:

U vremenskom periodu od kraja 2018. godine do 1.9.2024. godine, „(...)“ na području Bosne i Hercegovine organizovao grupu za organizovani kriminal u smislu člana 1. stav 22. Krivičnog zakona Bosne i Hercegovine, kojoj su kao članovi grupe svjesno i dobrovoljno pristupili Zlatko Ibrišimović, Alem Hodović, Maja Papić, Fikret Memić i druga njima poznata NN lica, koja je formirana radi činjena krivičnih djela propisanih krivičnim zakonima Bosne i Hercegovine, u namjeri sticanja protivpravne imovinske koristi, te djelovala na području Bosne i Hercegovine, Kraljevine Nizozemske, Kraljevine Belgije, Ujedinjenih Arapskih Emirata i drugih država Evropske Unije, pa je tako „(...)“ u međusobnom dogovoru sa ostalim pripadnicima donosio odluke o djelovanju grupe, odluke o izvršenju krivičnih djela, podjeli protivpravne koristi stečene krivičnim djelima, dok su pripadnici grupe postupali po njegovim naredbama i uputstvima, gdje je svako od njih imao svijest i znanje o određenim zadacima, radnjama izvršenja i doprinosu drugih pripadnika tokom izvršavanja krivičnih djela, te tom prilikom preduzimali i radnje koje su na odlučujući način doprinosili djelovanju ove grupe, svi svjesni zabranjenosti ovih radnji i htijući njihovo izvršenje, pa su tako članovi ove grupe u navedenom vremenskom periodu činili krivična djela Pranje novca iz člana 209. KZ BiH, znajući da je novac pribavljen počinjenjem krivičnih djela Neovlašteni promet opojnim drogama iz člana 195. KZ BiH u inostranstvu, da bi tako nezakonito stečen novac držali i istim raspolagali, te isti novac stavljali u legalne novčane tokove na način da su isti novac koristili u privrednom poslovanju, vršili prenos i konverziju istog, s ciljem prikrivanja izvora i prirode stečenog novca, te na druge načine putem pravnog lica „E.S. Tech“ d.o.o. Sarajevo, čiji je „(...)“ vlasnik, koristili za kupovinu pokretnih i nepokretnih stvari, ulaganje u nekretnine, te držali i drugu imovinu koja je stečena kao protivpravna imovinska korist iz učinjenja navedenih krivičnih djela, pri tome svjesni da na ovaj način vrše pranje novca u iznosu većem od 200.000,00 KM, što su i htjeli, koristeći za međusobnu komunikaciju, dogovaranje i izvršenje krivičnih djela posebno podešene mobilne telefone sa instaliranom aplikacijom SkyEcc namijenjenom za ostvarivanje zaštićene, kriptovane komunikacije, pri čemu je „(...)“ (SkyEcc kod ...) sam i posredstvom drugih njima poznatih lica obezbjeđivao kriptovane telefone za komunikaciju sa članovima grupe Zlatkom Ibrišimovićem i Majom Papić, koristeći odgovarajući kod/šifru prilikom korištenja pomenute aplikacije SkyEcc, i to: Zlatko Ibrišimović SkyEcc kod ..., a Maja Papić SkyEcc kod ..., vjerujući da će grupa preko navedenih sredstava komunikacije u tom trenutku nepristupačnim organima gonjenja neopaženo istrajati i činiti krivična djela radi kojih je i formirana, u kojim komunikacijama su dogovarali vrijeme, mjesto i način izvršenja krivičnih djela, te u okviru zajedničkog plana navedena grupa je vršila raspodjelu protivpravno pribavljenje imovinske koristi u vezi sa navedenim krivičnim djelima, kako između sebe, tako i sa ostalim članovima ove grupe za organizovani kriminal, pa su tako:

I

Zlatko Ibrišimović, Alem Hodović, E.S. TECH d.o.o. Sarajevo i „(...)“ , zajedno s njima poznatim licima

U vremenskom periodu od kraja 2018. godine, do 1.9.2024. godine, „(...)“ u namjeru unosa novca stečenog izvršenjem krivičnog djela u gotovini u privredno poslovanje u Bosni i Hercegovini, u januaru 2019. godine, formalno-pravno preuzeo vlasništvo pravnog lica „E.S. Tech“ d.o.o. Sarajevo, u kojem

je kao odgovorno lice – direktor bez ograničenja ovlaštenja bio Alem Hodović, dok je faktički „(...)“ bio vlasnik navedenog pravnog lica od kraja 2018. godine, pa je „(...)“ u navedenom periodu novac koji je poticao iz krivičnih djela Neovlašteni promet opojnim drogama iz člana 195. KZ BiH, koje je počinio u inostranstvu, lično i posredstvom njemu poznatih lica u više navrata u Sarajevu predavao Alemu Hodoviću njima poznate iznose tog novca u gotovini, u ukupnom iznosu od najmanje 165.356,81 KM, kojim je zatim u svojstvu odgovornog lica – direktora bez ograničenja ovlaštenja raspolagao na način da je navedeni novac polagao na bankovne račune pravnog lica „E.S. Tech“ d.o.o. Sarajevo, te ovako nezakonito stečen novac prikazivao kao legalan kroz transakcije pravnog lica, a zatim pravno lice plaćao preuzete obaveze nastale po osnovu kredita, leasinga i drugih obaveza, dok je dio novca u iznosu od najmanje 146.922,53 KM i u iznosu od 6.500,00 eura, koji je prethodno primio od „(...)“, po njegovim uputama, istim dalje raspolagao na način da je lično u gotovini plaćao na ime ulaganja u nepokretnosti u vlasništvu pravnog lica „E.S. Tech“ d.o.o. Sarajevo, sve u namjeri prikrivanja prirode i načina sticanja takvog novca, da bi u vremenskom periodu od 20.12.2019. godine, do najkasnije 8.3.2021. godine, „(...)“ angažovao Zlatko Ibrišimovića za kojeg je znao da obavlja advokatske poslove u Bosni i Hercegovini i da je osoba kojoj se može obratiti za savjet i upute u odnosu na namjeru prikrivanja stvarne prirode sredstava kojima raspolaže, te je u dogovoru i po uputama „(...)“, Zlatko Ibrišimović preuzeo ulogu da novac koji je dobio u gotovini od „(...)“ lično i posredstvom njemu poznatih lica u više navrata u Sarajevu, u iznosu od najmanje 110.000,00 eura, od kojeg novca je dio u iznosu od najmanje 10.000,00 eura dobio od „(...)“ kao vid protivpravne imovinske koristi, čuvao potom takav novac na njemu poznatoj lokaciji, od kojeg je dio novca predavao Alemu Hodoviću, koji je potom taj novac na prethodno opisani način polagao na bankovne račune pravnog lica „E.S. Tech“ d.o.o. Sarajevo, a drugi dio novca raspolagao na način da je lično plaćao na ime ulaganja u nepokretnosti u vlasništvu pravnog lica „E.S. Tech“ d.o.o. Sarajevo, pri tome znajući da na ovaj način vrše pranje novca u iznosu većem od 200.000,00 KM, što su i htjeli, pa su tako:

1. Zlatko Ibrišimović, Alem Hodović, E.S. TECH d.o.o. Sarajevo i „(...)“, zajedno s njima poznatim licima

U vremenskom periodu od 30.11.2018. godine do 1.9.2024. godine, novac za koji su znali da je stečen izvršenjem krivičnih djela Neovlašteni promet opojnim drogama iz člana 195. KZ BiH u inostranstvu, svjesni da ulaganjem u legalne novčane tokove prikrivaju način sticanja pomenutog novca, što su i htjeli, u namjeri kupovine nepokretnosti – stana koji se nalazi u Sarajevu, ... , „(...)“ u svojstvu vlasnika pravnog lica „E.S. Tech“ d.o.o. Sarajevo u januaru 2019. godine stupio u kontakt i dogovorio predmet kupovine, uslove i cijenu nepokretnosti sa odgovornim osobama pravnog lica „(...)“ i „(...)“ u iznosu od 280.000,00 KM, pri čemu je u kupoprodajnom ugovoru broj: ... zaključenim u kancelariji notara „(...)“ dana ... 2019. godine, u kojem se kao kupac nekretnine – stana, koji se nalazi ..., ukupne površine 135,99 m², upisano u Opštinskom sudu u Sarajevu, broj ZK uložka: ... katastarska Opština: Sarajevo VI, navodi pravno lice „E.S. Tech“ d.o.o. Sarajevo, iako je stvarni kupac nekretnine „(...)“, a kojeg je kupio s ciljem njegovog raspolaganja, da bi u cilju isplate dijela kupoprodajne cijene u iznosu od 250.000,00 KM, dana ...2019. godine, Alem Hodović u svojstvu direktora pravnog lica „E.S. Tech“ d.o.o. Sarajevo i „(...)“ banka Sarajevo zaključili Ugovor o dugoročnom finansijskom partnerstvu broj:

„(...)“ kao vlasnik i Alem Hodović kao direktor pravnog lica, svjesni da pravno lice ostvaruje zanemariv promet roba i usluga u obavljanju djelatnosti te da iz istog neće biti dovoljno sredstava za izmirivanje obaveza po kreditu, na bankovni račun pravnog lica polagali gotovinski novac u iznosu od najmanje 165.356,81 KM, za koji su znali da potiče iz krivičnog djela, te navedeni iskoristili kako bi dana ... 2019. godine, uplatili avans u iznosu od 10.000,00 KM i dana ... 2019. godine, iznos od 20.000,00 KM, potom iz tako položenog gotovog novca na računu na ime otplate četiri rate kredita uplatili ukupan iznos od 16.151,36 KM, da bi uslijed neurednog izvršavanja obaveza prema banci, dana ... i ... 2019. godine, te dana ... 2019. godine, „(...)“ banka Sarajevo po mjenici povukla s računa pravnog lica „E.S.Tech“ d.o.o. Sarajevo ukupan iznos od 12.568,51 KM, nakon čega je u cilju izvršavanja obaveza, ... sklopio sa bankom Sporazum o vansudskoj nagodbi broj: ... dana ... 2020. godine, a potom je pravno lice „E.S. Tech“ d.o.o. Sarajevo uplatilo iznos 6.751,19 KM na ime otplate rata, da bi „(...)“ nakon što je postojala opasnost da će banka oduzeti stan zbog neizmirenih obaveza, po prethodnom dogovoru sa njemu poznatim licem državljaninom Republike Turske, „(...)“ , ostatak duga po osnovu kredita u iznosu od 193.082,02 KM, isplatio na način da je „(...)“ navedeni iznos sa svog bankovnog računa prebacio na bankovni račun pravnog lica „E.S. Tech“ d.o.o. Sarajevo u vidu pozajmice, što je „(...)“ iskoristio za otplatu duga po kreditu, a potom navedeni novčani iznos „(...)“ je istom vratio u gotovini novcem koji potiče iz krivičnog djela Neovlašteni promet opojnim drogama iz člana 195. KZ BiH, koji je počinio u inostranstvu, svjestan da prikriva izvor i stvarnu prirodu novca koji potiče iz učinjenja predmetnog krivičnog djela, čime je na gore opisani način pravno lice „E.S. Tech“ d.o.o. Sarajevo steklo vlasništvo nad predmetnom nekretninom, iako je njen stvarni vlasnik „(...)“, te u cilju njenog daljeg raspolaganja, novac koji je stekao izvršenjem predmetnih krivičnih djela ulagao u izvođenje građevinskih radova i opremanje istog pa je tako dana ... 2019. godine dio novca u iznosu od 4.133,00 KM, koji novac je po njegovim uputama prethodno položen na bankovni račun pravnog lica čiji je vlasnik, iskorišten za uplatu na račun pravnom licu „(...)“, dok je dio novca u iznosu od 10.000,00 KM, po uputama „(...)“, Alem Hodović u Sarajevo lično u gotovini uplatio odgovornom licu u pravnom licu „(...)“ kao investitoru, zatim dana ... 2018. godine, „(...)“ uplatio avans u iznosu od 14.000,00 KM pravnom licu „(...)“ na iznos ponude broj: ... u ukupnom iznosu od 74.289,53 KM i dana ... 2018. godine, lično u Sarajevu uplatio iznos od 10.000,00 KM, dok su kompenzaciju preostalog duga u iznosu od 50.289,53 KM izvršili na način da je Alem Hodović lično vlasniku tog pravnog lica predao vozilo marke Volkswagen model Tiguan, te dana ... 2018. godine, „(...)“ lično u sjedištu pravnog lica „(...)“ u Sarajevu u gotovini isplatio novac u iznosu od 5.300,00 eura i dana ... 2018. godine, iznos od 2.035,00 eura, dok je u navedenom vremenskom periodu „(...)“ plaćao i radnicima naknadu za obavljeni rad lično u neutvrđenom iznosu, a po njegovim uputama, Alem Hodović u više navrata gotovinski dvojici radnika u ukupnom iznosu od najmanje 70.000,00 KM, i iznosu od 12.500,00 KM i 6.500,00 eura, te Zlatko Ibrišimović u iznosu od 7.000,00 KM, čim je izvršeno ulaganje u ukupnom iznosu od najmanje 177.922,53 KM i 13.835,00 eura.

2. Zlatko Ibrišimović, Alem Hodović, E.S. TECH d.o.o. Sarajevo i „(...)“ , zajedno s njima poznatim licima

U vremenskom periodu od 21.12.2018. godine, do 11.10.2021. godine, dio novca za koji su znali da je stečen izvršenjem krivičnog djela Neovlašten promet opojnim drogama iz člana 195. KZ BiH, koja su počinjena od strane „(...)“ u inostranstvu, svjesni da ulaganjem u legalne novčane tokove prikrivaju prirodu i način sticanja pomenutog novca, što su i htjeli, koristili za plaćanje mjesečnih leasing naknada za vozila s namjerom trajnog otkupa vozila nakon isteka trajanja leasinga, „(...)“ osiguranja, registraciju i ostale troškove održavanja vozila, i to za: pmv tip Porsche, model: Macan S Diesel, broj šasije..., motor ..., registarskih oznaka ..., u iznosu od 42.244,02 KM i za pmv marke Porsche model Panamera GTS, broj šasije ..., motor ..., registarskih oznaka ..., u iznosu od 80.166,85 KM, te za plaćanje naknada za zakup pmv tip Porsche, model Cayenne, S Coupe, registarskih oznaka ..., u iznosu od 41.600,00 KM, pmv marke Audi model A6, registarskih oznaka ..., u iznosu od 1.540,00 KM, pmv marke Seat model Leon, registarskih oznaka ..., u iznosu od 428,20 KM, te plaćanja na ime ostalih troškova održavanja vozila u iznosu od 662,17 KM, odnosno u ukupnom iznosu od 166.979,07 KM, sve u cilju prikrivanja izvora i stvarne prirode novca koji potiče iz učinjenja predmetnog krivičnog djela.

3. Alem Hodović, E.S. TECH d.o.o. Sarajevo, „(...)“

U vremenskom periodu od 28.12.2018. godine, do 19.9.2019. godine, dio novca za koji su znali da je stečen izvršenjem krivičnog djela Neovlašten promet opojnim drogama iz člana 195. KZ BiH, koja su počinjena od strane „(...)“ u inostranstvu, svjesni da ulaganjem u legalne novčane tokove prikrivaju prirodu i način sticanja pomenutog novca, što su i htjeli, koristili za plaćanje troškova putovanja u iznosu od najmanje 18.801,00 KM i troškove hotelskog smještaja u iznosu od najmanje 20.523,65 KM i 544,93 eura, odnosno u ukupnom iznosu od najmanje 39.324,65 KM i 544,93 eura, sve u cilju prikrivanja izvora i stvarne prirode novca koji potiče iz učinjenja predmetnog krivičnog djela.

II

Maja Papić, Fikret Memić, Zlatko Ibrišimović, E.S. TECH d.o.o. i „(...)“

U vremenskom periodu od početka 2019. godine do 1.9.2024. godine, „(...)“ i Maja Papić, novac za koji su znali da je stečen izvršenjem krivičnog djela Neovlašteni promet opojnim drogama iz člana 195. KZ BiH, koje je „(...)“ počinio u inostranstvu, svjesni da ulaganjem u legalne novčane tokove prikrivaju način sticanja pomenutog novca, što su i htjeli, u namjeri kupovine nepokretnosti - stana koji se nalazi u Sarajevu, ..., „(...)“ i Maja Papić stupili u kontakt sa vlasnikom nekretnine Fikretom Memićem i dogovorili predmet kupovine, uslove i cijenu nepokretnosti u iznosu od 220.000,00 eura, pri čemu je u kupoprodajnom ugovoru broj:..., zaključenim u kancelariji notara ... dana ... 2020. godine, u kojem se kao kupac nekretnine – stana, ..., ukupne površine 144,09 m², upisano u Opštinskom sudu u Sarajevu, broj ZK uložka:..., katastarska Opština: Sarajevo VII, navodi Maja Papić, i gdje su prethodno dogovorili upis unosa niže kupoprodajne cijene u iznosu od 200.000,00 KM, pri čemu je Zlatko Ibrišimović, kojeg je angažovao „(...)“ i za kojeg je znao da obavlja advokatske poslove u Bosni i Hercegovini i da mu se može obratiti za savjete i upute u odnosu na namjeru prikrivanja stvarne prirode sredstava kojima raspolaže, isti posredovao kod „(...)“ banke Sarajevo da ta banka odobri kredit

Maji Papić, nakon čega je dio novca koji je Zlatku Ibrišimoviću prethodno predao „(...)“ posredstvom njemu poznatih osoba, u iznosu od najmanje 110.000,00 eura, za koji je znao da potiče iz predmetnog krivičnog djela, istim novcem Zlatko Ibrišimović dalje raspolagao na način da je dio tog novca u iznosu od 30.000,00 KM predao Maji Papić koja je dana ... 2020. godine, isti položila kao depozit pri dobijanju kredita, te je iz iznosa navedenog kredita isplatila ugovorenu kupoprodajnu cijenu stana od 200.000,00 KM Fikretu Memiću, da bi po realizaciji kredita Zlatko Ibrišimović kontinuirano davao upute i savjete „(...)“ o načinu otplate kredita novcem u gotovini, dok je ostatak stvarne cijene stana u iznosu od 120.000,00 eura, „(...)“ lično isplatio Fikretu Memiću novac za koji novac je znao da potiče iz predmetnog krivičnog djela, u više navrata u Sarajevu u ukupnom iznosu od 50.000,00 eura u gotovini, te u svojstvu vlasnika pravnog lica „E.S. Tech“ d.o.o. Sarajevo, dana ... 2019. godine, putem bankovnog računa uplatio iznos od 9.750,00 KM, a po uputama i u dogovoru sa „(...)“, Maja Papić predala novac u gotovini Fikretu Memiću u iznosu od 50.000,00 eura u Bredi, u Kraljevini Nizozemskoj i Zlatko Ibrišimović u iznosu od 15.000,00 eura u Sarajevu, pri čemu je „(...)“ insistirao da nigdje ne bude zabilježeno da je stan plaćen gotovim novcem čime je u konačnici na naprijed opisani način Maja Papić, ... „(...)“ stekla pravo vlasništva nad stanom koji se nalazi u Sarajevu, ... a koji je kupljen za novac koji potiče iz krivičnog djela.

III

Zlatko Ibrišimović i „(...)“, zajedno s drugim njima poznatim licima

U vremenskom periodu od marta 2020. godine do 8.3.2021. godine, nakon što je „(...)“ u namjeri prikrivanja stvarne prirode novca koji je stekao kao protivpravnu imovinsku korist iz učinjenja krivičnih djela Neovlašten promet opojnim drogama iz člana 195. KZ BiH koja su počinjena u inostranstvu, novac koji je stekao na ovaj način primao i držao u svom posjedu, a zatim njime raspolagao na način da ga je koristio za kupovinu dva ručna sata marke „Richard Mille“ i „Patek Philippe“, iako je bio svjestan i znao da se radi o novcu koji je stekao učinjenjem predmetnih krivičnih djela, pa je tako stečenim novcem stekao vlasništvo nad pokretninama u iznosu od najmanje 615.000,00 eura, te u namjeri daljeg prikrivanja prirode i načina sticanja nezakonite imovine, lokacije i njihovog vlasništva, u prvoj polovini 2020. godine, u Sarajevu, „(...)“ lično predao sat marke „Richard Mille“ na čuvanje Zlatku Ibrišimoviću, kojeg je angažovao znajući da obavlja advokatske poslove u Bosni i Hercegovini i da mu se može obratiti za savjete i upute u odnosu na namjeru prikrivanja stvarne prirode sredstava kojima raspolaže, nakon čega je po uputi i u dogovoru sa „(...)“, Zlatko Ibrišimović posredstvom „(...)“ preuzeo sat marke „Patek Phillipe“ od njima poznatog lica na području Živinica, nakon čega je u navedenom vremenskom periodu Zlatko Ibrišimović postupajući po uputstvima „(...)“ navedene satove držao u sefu zakupljenom kod „(...)“ banke u Sarajevu, iako je bio svjestan i znao da se radi o imovini koju je „(...)“ stekao učinjenjem krivičnih djela, sve s ciljem prikrivanja prirode i načina sticanja, lokacije i vlasništva nezakonite imovine stečene učinjenjem krivičnih djela.

IV

Zlatko Ibrišimović, zajedno s drugim njemu poznatim licima

Dana 16.4.2018. godine u Sarajevu, Zlatko Ibrišimović uz prethodni dogovor sa njemu poznatim licem „(...)“, državljaninom Crne Gore, novac za koji je svjestan da potiče iz krivičnog djela „Teško ubistvo“ učinjeno iz koristoljublja iz člana 114. stav 5. Krivičnog zakonika Republike Srbije i drugih krivičnih djela počinjenih na teritoriju Republike Srbije i htijući to, preuzeo takav novac u iznosu od 15.670,00 eura od „(...)“, koji je novac ... iz Crne Gore u Sarajevo, da bi istog dana izvršio konverziju novca u iznosu od 15.670,00 eura u konvertibilne marke protivvrijednosti od 30.400,00 KM, te u cilju ulaganja istog u legalne novčane tokove pomenutim novcem dalje raspolagao na način da je navedeni iznos uplatio na bankovni račun Federalnog ministarstva finansija otvorenog kod „(...)“ banke d.d. Sarajevo, broj: ... svrha uplate:..., a sve kako bi isti iskoristili da se zamijeni kazna zatvora u trajanju od po godinu dana novčanom kaznom osuđenim licima „(...)“ i „(...)“ po presudi Opštinskog suda u Sarajevu broj: ... od ... 2018. godine, u preostalom dijelu iznosa.

Čime bi:

1. Zlatko Ibrišimović radnjama opisanim u preambuli optužnice, kao i tačkama I, II, I2, I3 počinio krivično djelo Organizovani kriminal iz člana 250. stav 2. KZ BiH u vezi sa krivičnim djelom Pranje novca iz člana 209. stav 3. u vezi stava 1. istog člana KZ BiH i pod tačkom IV počinio krivično djelo Pranje novca iz člana 209. stav 1. KZ BiH, a sve u vezi s članom 53. KZ BiH;
2. Alem Hodović radnjama opisanim u preambuli optužnice, kao i tačkama I, II, I2, I3 počinio krivično djelo Organizovani kriminal iz člana 250. stav 2. KZ BiH u vezi sa krivičnim djelom Pranje novca iz člana 209. stav 3. u vezi stava 1. istog člana KZ BiH;
3. Maja Papić radnjama opisanim u preambuli optužnice, kao i tački II počinila krivično djelo Organizovani kriminal iz člana 250. stav 2. KZ BiH u vezi sa krivičnim djelom Pranje novca iz člana 209. stav 3. u vezi stava 1. istog člana KZ BiH;
4. Fikret Memić radnjama opisanim u preambuli optužnice, kao i tački II počinio krivično djelo Organizovani kriminal iz člana 250. stav 2. KZ BiH u vezi sa krivičnim djelom Pranje novca iz člana 209. stav 3. u vezi stava 1. istog člana KZ BiH;
5. Pravno lice „E.S. Tech“ d.o.o. Sarajevo radnjama opisanim u preambuli optužnice, kao i tačkama I, II, I2, I3, II počinilo krivično djelo Pranje novca iz člana 209. stav 3. u vezi sa stavom 1. istog člana KZ BiH, a u vezi s članom 124. tačka c) KZ BiH.

**TUŽILAC
TUŽILAŠTVA
BOSNE I HERCEGOVINE**